



● EDITORIAL ● RÂL VÊNGTU ● CHHÛNGKAW CHANCHIN

- ✦ Biateram Synod Jubilee-ah kal dâwn
- ✦ Hruaina Êng Quiz zawh a ni ta
- ✦ ATC Day 2015 hman a ni

RNI 68092/83 Regn. No. N.E. 1024  
From  
Synod Literature & Publication Board  
Synod Office, Aizawl - 796 001,  
Mizoram. Phone - 0389-2324590

# SYNOD *Newsletter*

Volume XXIX

No. 387

E-mail : [synodnews@gmail.com](mailto:synodnews@gmail.com)

DECEMBER, 2015

## SYNOD EXECUTIVE COMMITTEE VAWI 258 & 259-NA THUREL THENKHAT

- \* *Synod hotu hrang hrang term tawpte hmuna thawk tûr thlan thar an ni*
- \* *Women Centre Kaihruaina leh Synod Prison Ministry Kaihruaina siam a ni*

Synod Executive Committee vawi 258-na chu ruahman lâwk angin November 10, 2015 khân J.M. Lloyd Hall, Synod Office-ah an thû a, thut hun tûra ruahman, ni thum chhûnga an rêl zawh hman loh avângin ni khatin pawh sei a ni a, Nov. 10-13, 2015 chhûng an thû. SEC member 152-ah \_\_\_\_ an kal thei. Synod hnuai hotu – Department head, kum thum term-a thlante term tâwp kum a nih avângin inthlan thar a ni a; Presbytery aţanga SEC-a lût tûra tihte ngaihtuah a ni bawk a, hengte hian hun a duh deuh avângin rorêl hun tûra tihah an zo hman lo a ni. December 2, 2015 khân ruahman lâwk angin SEC hi an thû leh a, member 152-ah \_\_\_\_ an kal thei. An thurêl tlangpui, hriat âwm chite chu hetiang a ni:

**1. Hotu thlan tharte:** Synod hnuai hotute, kum thum ţang tûra thlan thîn hêng a hnuai târ lante hi thlan thar an ni a, Synod Inkhâwmpui 2015-a pawm tûra chhawp an ni:

- (1) *Synod Executive Secretary-te*
  - (a) Rev. Lalramliana Pachuau
  - (b) Rev. P.C. Pachhûnga
  - (c) Rev. B. Sângthanga
- (2) *Synod Mission Board Secretary*  
Rev. K. Lalrinmawia
- (3) *Secretary & Editor, SL&PB*  
Rev. Dr. C. Chawngmingliana
- (4) *Synod Administrative Secretary-te*

Barak Area	-	Rev. Z.D. Lalhmachhuana
Chhim Bial	-	Rev. R.C. Lalnghâkliana
Manipur Area	-	Rev. C. Zoramawia
- (5) *Principal, Synod Higher Sec. School*  
Pu Lalvena Hnamte
- (6) *Director, Synod Hospital*  
Dr. LH Thanga Singson

**2. Synod Endowment Fund:** Synod chhawmdâwlina sum (Synod Endowment Fund) chu a enkawltute Board-in an rawt, SEC-in a lo pawm tawh angin a tîem berah nuai 500 dah a nih theih nân hma lâk a ni a, kum 2016-2017 budget-ah cheng nuai 50 dah tûra tih a ni a; Endowment Fund chungchâng a inngenna leh thil pawimawh inhriattîrna pawh a remchâng anga kalpui remtih a ni.

**3. Nupa Chungchâng Dân en thar:** The Mizo Marriage, Divorce and Inheritance of Property Act, 2014 leh Synod-in Nupa Chungchâng Dân a hman mêk inkaihnhawihna awmte avângin Nupa Thu Sub Committee-in ennawn an rawtna leh Inneih Certificate hman mêk siam thar rawtna chu Synod-a thlen tûra pawm a ni.

**4. MPF General Secretary full time-a thawk tûr:** Mizoram People Forum Governing Board-in hun pum (full time)-a thawk tûr General Secretary ruat tûra Mizoram Presbyterian Kohhran a

ngenna chu remtih a ni a, Synod Officers' Meeting (OM)-in a lo ruat tûra dah a ni.

**5. NCCI General Secretary:** Rev. Dr. Roger Gaikwad, General Secretary, NCCI chu he hna atâna kum thum dang rawih zui leh an dîl angin a thawh chhunzawm remtih a ni.

**6. Superintendent, Synod Office ruat thar:** Superintendent, Synod Office thawk lai chu a term a lo tâwp dâwn tâk avângin kum 2016-2018 chhûnga he hna thawk tûr hian Upa Lalrinmuana, Co-ordinator, SMB-a awm mêk chu ruat a ni.

**7. Bishop's College-a thawk tûr:** Bishop's College a Old Testament Lecturer, Rev. F.H. Liansangzualan D.Th. a zir dâwn tâk avângin a hmuna thawktu pe leh tûra Mizoram Synod an rawn ngen angin Kolkata Bialtu Pastor hnuai Pro Pastor hna thawk chung a hmaa mi term zuia Old Testament Lecturer hna thawk tûrin Pro. Pastor Alfred Lalruatfela, Saiha chu ruat a ni.

**8. Presbyterian English School hawn phalsak:** Heng Kohhran pathum (1) West Lungdar Kohhran (2) Champhai Zote Kohhran leh (3) Ngur Kohhranah te hian Presbyterian English School hawn phalsak an ni.

**9. Women Centre kaihruaina:** Women Centre kaihruaina siam thar a ni a, Superintendent leh Chowkidar post siam remtih a ni a, thawktu dang chu training programme neih dân azira Kohhran Hmeichhiaten an rawih tûra tih a ni.

**10. 2018 Nilai leh Beihruat thupui ziaktu:** Kum 2018 Nilai leh Beihruat thupui ziaktu atân Rev. Thangzauva, Ramhlun ruat a ni.

**11. Interserve India nena partnership renew:** Interserve India nena kan thawhhona chungchângah Partnership renew tûr remtih a ni.

**12. Manipuri Presbyterian Church-a thawk tur:** Manipuri Presbyterian Church-in thawktu dilna chu pêk remtih a ni a, Pastoral Committee bawh zui atâna dah a ni.

**13. Bial vawngtu Pastor-in seal/stamp neih rawtna:** Bial vawngtu Pastor-te tan seal hman tûlna hrang hrang a awm thîn

*Phek 2-naah chhunzawm a ni...*

# SYNOD Newsletter

## EDITORIAL STAFF

Rev. K. Lalpiangthara (LPT)  
Rev. Thangzauva (TZ)  
Upa H. Ronghaka (HR)  
Upa Khawlungnunga (KCN)

## Editorial

### MAHNI HMASIALNA

Mahni hmasial kan tih hote hi mihring nunhona leh thawh hona tinuam lotute an ni a, an thlen chin apiangah mi hnawksak an tling. Chutiang bawkin mi dang ngai pawimawh mi leh mi dang ta en nachang hre tlat mite hi mi kawm nuam leh khawvêl tinuamtu an ni thung.

Mahni hmasialna hian kan ram rorênaah te, kan eizawnaah te leh kohhran rorênaah te hian hmun a chang thuk ta hle mai a. Thil dang chu lo dah tha ta ila, kohhran rorêna thleng pawha mahni hmasialnain langsar taka hmai a rawn pho lang ngam ta mai hi a vei awm ta khawp mai. A bik takin rawngbawltuten fimkhurna tur kan neih pawimawh tak chu Inkhawmpuia chanvo kan inruat dân chungchângah a ni a. Ruat theitu dinhmunadintgen mahni inruat kan hreh lo chho ta viau mai a, hetiang hi thil pawl tak a ni. Chhûngkhat leh inthian thatna boruak avanga lam tang insiam ang chite pawh hi thil hnawksak tak a ni. Chanvo inruat dân chungchângah Bial Inkhawmpuia kohhran tê deuh te, Presbytery Inkhawmpuia Bial tê deuh te, Synod Inkhawmpuia Presbytery langsar lo deuh te leh General Assembly lamah Synod tê zâwkte rorêna a fawnga chelhtuten an hriat tlat a pawimawh. Mahni hmasialna um bo ila, mahni aia mi dang ngaih pawimawhna hian kohhranah hmun chang zêl rawh se.

### CONTRACT MISSIONARY THAR

Synod Mission Board chuan Contract Missionary tur mi 98, mipa 40 leh hmeichhia 58 a la thar a. Thiamna lamah Post Graduate an awm laiin Under Matric mi eng emaw zat an awm bawk. Heng missionary lak tharte hian kum thar January 6- February 5, 2016 chhûngin JM Lloyd Hall, Synod Office-ah Orientation Training an nei ang. Category hrang hranga an lak dân chu hetiang hi a ni.

Evangelist Teacher	-	28
Evangelist	-	56
Craft Teacher	-	5
Staff Nurse	-	5
Health Worker	-	3
Gospel Team Member	-	1

### Phêk 1-na zawmna...

avângin Pastor-ten seal/rubber stamp nei tawh tura tih a ni a, inang tlanga siam tura tih a ni a, OM bawh zui atan dah a ni.

**14. Pathian Biak Inkhawm Hruaina bua telh tur:** Pathian Biak Inkhawm Hruaina bu chhut thar leh tur atang chuan 'Rawngbawltu Thlahna Inkhawm Programme' leh Baptisma Sakramen hrilfhahna telh remtih a ni.

**15. Inneih inkhawm leh Minister/Upa thite vûi inkhawm dâr nawn thu:** Inneih inkhawm leh Minister leh Upa thite vûina hunah Biak Ina inkhawmah hi chuan dâr nawn hunah inkhawm dâr nawn dân pangngaiin dâr nawn zêl tura tih a ni.

**16. Sakramen zirlaite lawm luh thu:** Sakramen zirlaite anmahni kohhran ni lova lawm luh a remchân zâwk hun a lo awm a nih chuan lawm luh turte awmna kohhran nen inbe râwna ruahmanna siam nise tih a ni.

**17. Kristian Hlabu Dai tawnga lehlin chungchâng:** Kristian Hlabu Dai tawnga lehlin leh anmahni sensova Tonic Solfa tela an chhuah phalsak an ni.

### 18. Service Board atanga thu lut:

(1) Synod Hospital atan Dialysis Technician post pahnih leh Lithotripsy Technician post pakhat siam remtih a ni.

(2) Rev. H. Zothansanga i/c Luangmual Pastor Bialin a document dang nena inmil tura a hming ziah dân - Rev. Zothansanga tia siam that a dilna chu remtih a ni.

(3) Women Centre atan Superintendent post pakhat leh Chowkidar post pakhat siam remtih a ni.

(4) Pi Lalngakliani, Office Assistant chu Asst. Co-ordinator-ah hlânkai a ni.

**19. Thawktu dah ngheh tharte:** SMTC-a contract basis-a thawk mi pahnih - H. Vânlalliana, Instructor leh Zonunsangi, Office Assistant te; PRESCOM-a contract basis-a thawk mi pali - Lalnunthari Khiangte, Seller; Lalhruaitluanga, Computer Operator; VL Zothanmawia, Branch i/c Hqrs. leh Benjamin MS Dawngkima, Seller te chu November 1, 2015 atanga dah ngheh (regularised) thar an ni.

20. Upa F. Lalsangliana, Co-ordinator, Synod Hospital chu contract-a rawih chhuzawm a ni.

**21. Designated Quarters luah theitu en that:** Synod Officers' Meeting-in Synod mi rawih chenna tur in (quarters /accomodation) enthatna atana ruahmanna chu hman nghal tura pawm a ni.

**22. ATC-a M.Th (Christian Ministry) hawn:** M.Th (Christian Ministry) zirna chu zirna in lam an inpeih tawh avângin hawn remtih a ni.

**23. University of Holy Land nena thawh dun:** University of Holy Land leh Theological Education Board thawh dun rawtna chu a thuphungin remtih a ni a. Thawhdunna chungchanga sum sên tur lian tham a awm a nih chuan SEC ah thlen leh tura tih a ni.

**24. SATHRI sak chhuzawmna tur sum:** Serampore College atanga SATHRI building sak chhuzawmna tura sum dilna chu rem tih a ni a, hemi atan hian Rs. 1,00,000/- (Cheng nuai khat) pêk tura tih a ni.

25. SEC aiawh Synod Nomination Committee Member 2016 atana thlante:

- (1) Upa C. Thansiam
- (2) Rev P.C. Pachhûnga
- (3) Rev. Lianhmingthanga Sailo

### BIATERAM SYNOD JUBILEE LAWMNAA SYNOD AIAWH

Biateram Presbyterian Kohhran Synod chuan 18-20 December, 2015 chhûng hian an Synod kum 125-na Quasquicentennial Jubilee ropui taka lawm an tum a; Mizoram Synod atanga a lawmnaa aiawh tur tura min rawn sawm angin Rev. Lalramliana Pachuau, Sr. Executive Secretary leh Upa H. Ronghaka, Synod Secretary (Sr.) te kal tura ruat an ni. An Jubilee lawmpui nân hian Mizoram Synod-in Rs. 1,00,000/- (cheng nuai khat) a pe.

### PCI MISSION CONFERENCE

Presbyterian Church of India (PCI) General Assembly hnuai Mission & Evangelism Committee chuan November 26-29, 2015 chhûng khân Laban Presbyterian Kohhran, Shillong-ah Mission Conference lian tham tak a buatsaih a, Mizoram Synod atanga tel tur ruat tura a ngen angin heng Kohhran - Madanring, Shillong, Guwahati, Bungkawn leh Vaivakawn atang te leh Synod Mission Board-in missionary thawk lai kal tura a ruatte Synod aiawhin an tel. Thupui zir ho leh sawi ho bakah fellowship/inkhawm hlimawm tak buatsaih a ni a. Mizoram Synod aiawha kalte kalna motor hman man hi Synod-in a pêsak a ni.

# Râl Vêngtu

Zo khaw lama Harhna chhima kal haw nuvalai rual khat chuan Amen leh Hallelui pe that that chungin Râl Vêngtu vên bûk lam an pan a. Râl Vêngtu hnênah chuan an kalna kohhran an hlimzia te, an Upate leh rawngbâwltu dangte an inpêkzia te, thu an sawi thiamzia te leh mikhual an ngaihsakzia te an sawi mawlh mawlh a. An zînga upa ber chuan an kohhran Upate leh rawngbâwltute thîng a tihzia leh an kalna kohhran Upate leh rawngbâwltute ang vek ni ve se a tihzia te duhâm takin a sawi a.

Râl Vêngtu chuan, “E khai, in zinna lamah chuan Lal Isua dârlhalang ni lovin Setana dârlhalangah in han inen a ni maw. Lal Isua dârlhalangah mi a inen chuan mi dang hmu lovin mahni chia a inhmu thîn a. Setana dârlhalangah chuan mi, mahni a in hmu hlei thei lo va, mi dang hlîr a hmu thîn asin. Thlarau dik pâwlnaah chuan miin mi dang a hmu thei tawh thîn lo va, mahni chia a inhmu a, Upa leh mi dangte hmai balhna hmuh tûr a hre tawh ngai lo va, ama hmai balhna chia hmuin a insiam tha thîn alawm. In kal leh hunah chuan Lal Isua dârlhalangah ngei in inen tawh dâwn nia,” tiin a hrilh a, zin leh tûl inti takin an tîn ta a.

## DR. RAMDINTHARA SAILO TE NUPA JW HOSPITAL-AH

Synod Mission Board-in Council for World Mission (CWM) hnuai Solomon Island-a missionary-a a tih Dr. Ramdinthara Sailo leh a nupui Dr. Zochuani Râltê te chu an thawhnaah an term a tâwp avângin Mizoram an lo chhuak dâwn a, 2016 kum thar aţangin John Williams Hospital, Lungleia thawk zui tûra tih an ni.

## MPF GENERAL SECRETARY THAR

Mizoram People Forum (MPF)-in hun pum (full time)-a thawk tûr, MPF General Secretary ruat tûra Mizoram Presbyterian Kohhran Synod an ngen angin he hna thawk tûr hian Rev. Dr. R. Lalbiakmawia ruat a ni. Kum thar 2016 Office hawn aţangin he hna hi thawk tûr tûra ngaih a ni.

## MKHC MEMBER THAR

Mizoram Kohhran Hruaitute Committee (MKHC) member term a lo tâwp dâwn tâk avângin Mizoram Presbyterian Kohhran Synod aiawh tûr ruat tûra MKHC-in a ngen angin heng mite hi ruat an ni: 1. Rev. H. Lalrinmawia, Moderator; 2. Upa H. Ronghâka, Secretary (Sr.); 3. Rev. Lalramliana Pachuau, Sr. Executive Secretary

## SYNOD HOSPITAL, DURTLÂNG OCTOBER, 2015 CHHÛNGA THILPÊK DAWNTE

### I. CHARITY FUND

1. Upa J.H Lianghâka, Vaphai	₹	1,000
2. Pu Lalnunsânga, Durtlâng Dâwrkâwn	₹	1,000
3. Zorinawmi, Zârkawt	₹	3,500
4. New Sêrchhîp Kohhran Hmeichhia	₹	2,000
5. Pu Rosawmliana Vârtê, Durtlâng Leitan	₹	1,000
6. Taxi Welfare, Synod Hospital Stand	₹	3,000
7. Lungdai Kohhran	₹	1,000
8. Lalramena Râltê, Durtlâng Dâwrkâwn	₹	1,500
9. Pu Lalnunsânga, Durtlâng Dâwrkâwn	₹	1,000
10. Maubaw 'W' Kohhran Hmeichhia	₹	10,000
11. Sacrament Department, Chawnpui Vêngthlang	₹	1,000
12. V.L. Nawli, Zârkawt	₹	2,000
13. Champhai Vêngsang Kohhran Hmeichhia	₹	5,000

### II. GRACE HOME TÂNÀ THILPÊK PETUTE

1. Silver Jubilee Celebration Comt., Ramhlun Vênglai Kohhran	₹	10,000
2. New Sêrchhîp Kohhran Hmeichhia	₹	2,000
3. Gen. Secretary, Central KÏP, (Cook hlawh July - Oct, 2015)	₹	12,000

### III. THISEN PE TE

1. KÏP, Sesawng Bial	17 Units
2. KÏP, Mission Vêngthlang Branch	48 Units
3. Tuipuiral Zirlai Pâwl	49 Units
4. KÏP, Sêrchhîp Vêngchung Branch	32 Units
5. KÏP, Chanmari Bial, Aizâwl	39 Units
6. KÏP, Keifang Bial	58 Units

### IV. THIL DANG PE TE

1. Pi Vanlalrovi, Ramhlun 'N', Aizawl	Blood Bank-a hman tûr Wall Clock 1 (A pasal Pu Vanlalrovi a Vanchhawng (L) hriat reng nân)
2. Zonunsiami Fanai, Kulikawn	Pi Puii In atân Gas Stove (2 burners) 1
3. Catherine Lalruaitluangi, Cl-X, Synod HSS	₹300 ( District School games-a alâwmmman)

Khawngaihna leh duhsaknaa thilpêk min petute zawng zawng hnênah Lalpa Isua Krista hmingin lawmthu kan sawi tak meuh meuh a ni. Hêng in thilpêk kan dawnte hian damlo awm man harsate thlamuang takin a awmtîr a, Hospital mamawh tam tak min puhruksak bawka ni.

Sd/- REV. R. RAMDINMAWIA  
Chaplain, Synod Hospital, Durtlâng

## Rb.H KIRLOSKAR HRUAINA ÊNG QUIZ ZAWH A NI TA

November 5, 2015 zân aţanga Synod Information & Publicity (Synfo) buatsaih Rb.H Kirloskar Hruaina Êng Quiz chu November 27, 2015 zân dâr 7:30 khan Top 3 te Final Round inelna an nei a, result puan leh lawmman semna neiin khârna hun hman ngâl a ni.

November 20, 2015 khân Top 10 ten inelna an nei a, chung zîng aţang chuan Ramhlun Vênglai, Khatla East leh Kolasib Diakkâwn ten Final Round hi an lut a, Final Round thleng zo lo Branch 7 te hnênah Consolation Prize Rs. 3,000/- leh Citation hlan an ni. November 27, 2015 zân khân Top 3 ten inelna nei leh in an result hetiang a ni :

Pakhatna : Ramhlun Vênglai  
Pahnihna : Kolasib Diakkawn  
Pathumna : Khatla East

Final Round-ah hian Jakoba, Kohhran Chanchin, Visual Round aţangin inelna nei a ni. Rb.H Kirloskar Hruaina Êng Quiz hi rampum huap Kohhran Pavalai Pâwl puala buatsaih a ni a, Kohhran 99 lai an tel a ni. Quiz tiţa lâwmmmanah hian pakhatnain Rs. 80,000/-, Citation & Trophy, pahnihnain Rs.50,000/-, Citation & Trophy leh pathumnain Rs. 30,000/-, Citation & Trohy an dawng a ni.

Result puan hma hian Upa Biakchungnunga, Member, Synfo Comt-in hunserh a hman a, Rev. Lalramliana Pachuau, Executive Secretary i/c Synfo in lâwmthu sawina a nei a, Rev. Lalzuithanga, Senior Executive Secretary-in result puangin pakhatna lâwmmman hi a hlan ngâl a ni. Pahnihna lâwmmman hi Upa Zonunmawia, General Secretary, Central KÏP in a hlân a, pathumna lâwmmman hi Rev. R. Lalchangliana, Director, Synod Revival-in a hlân bawka ni.

## OFFSET PRINTING MACHINE THAR

November 24, 2015 (Thawhlehi) khân Synod Press khawl thar Offset Printing Machine chu Rev. Lalrinmawia, Synod Moderator-in Pathian hnênah a hlân.

Hlanna inkhâwm hi Upa R. Lalmalsâwma, General Manager, PRESCOM-in a kaihrui a, Pu Lalruaitluanga Râltê, Manager, Synod Press-in report a pe a ni.

He Offset printing khawl hi German Company Heidelberg siam a ni a, SORK model niin, inches 19 leh 26 a hlai lehkhapuan a chhu thei a, lehkhapuan pan têt aţanga lehkhawng chhah pui pui thlengin a chhu thei vek a ni. He khawl hi Single Color Offset Machine a ni a, vawi khat chhutah rawng chi khat zêl a chhu thei tihna a ni.

He khawl hian a thawh ber tûr chu receipt bu te, form chi hrang hrang leh inkhâwmpui minute te, hospital-a hman tûr form chi hrang hrang leh letterhead ang chi te leh hna têt nau chhut nân hman a ni thîn dâwn a ni.



## PRESBYTERIAN BIBLE SCHOOL FAREWELL AND DEDICATION

Presbyterian Bible School chuan December 1, 2015 chawhnu dâr 1:00 khân 35<sup>th</sup> Session Farewell and Dedication Programme Pi Zaii Hall, Synod Conference Centre-ah an hmang.

Programme hi Synod Moderator Rev. Lalrinmawia'n inkhâwm a kaihruai a, Bible chhiar leh ÷awngñaina te a hman zawhin Rev. R. Lalsâwta'n inlawmna leh inhmelhriattîrna hun a hmang a. PBS Principal Rev. Lalneihvûra'n report a pe. Synod Finance Officer Rev. Dr. R. Lalbiakmawia'n zirchhuakte hnênah certificate a hlân a, NI. Ruthi CVL Muanpuii'n Pathian fakna hla mawi takin a sa bawk.

Moderator-in zirlaite hlanna leh thuchah a sawi a, zirlai tiñha te leh Class kal kimte hnênah Upa C. Lalbiakluanga, Board memberin lawmman a hlân a, Pu C. Awithanga Award pawh Pu C. Awithanga chhûngten hlanna an nei bawk. Zirlai aiawh leh Pu C. Awithanga chhûngten thu

tawi sawina hun an hmang a. Synod Statistician Upa Vâñgmawia'n zirlaite tâna ÷awngñaisakna a nei a, Rev. Vâñlaluata'n lâwmthu sawina hun a hmang bawk.

Tûna session 35-naah hian zirlai 67 an awm a, 59 passed-in 4 an failed a, exam lo 4 an awm. Exam-a tiñha zual pathumna thlengin lâwmman Rs.1000/-, Rs.700/-, Rs. 500/- hlan an ni a, tûn Session a zirlai zîngah hian kai kim 17 lai an awm a, an hnênah hian lâwmman Rs. 500/- ÷euh hlan a ni bawk. Session tinin zirlai zîngah Kristian Theology leh Kohhran Inrêlbâwlna & PCI Danpui subject-ahte hian a tiñha ber hnênah Pu C. Awithanga Award hlan ÷hin a ni a, award hian pawisa fai Rs. 1000/- a keng tel a ni.

**Bâwktlâng Kohhran** chuan ni 9-15 November, 2015 chhûng khân Pu R. Laltilanchhuaha leh a team Gospel Peniel Team te ruaiin Crusade hlimawm tak an hmang a. Biak In thleng pha tawh ngai lo te pawhin Biak In thleng leh in, mi tam takin harh tharna changin Thlarau Thianghlim hnathawh ropui tak an kohhranin an chang thar a, kohhranhote an lâwm hle.

## SÂWMNA

□ Kolasib Tumpui Presbyterian Kohhran chuan ni 21-27 November, 2016 hian Kohhran Centenary (Km 100 tlin) lawmna hun a hmang dâwn a. Ni 1 January, 2016 chhûn dâr 12:00AM ah Centenary meidêt leh Centenary hlanna programme a hmang dâwn a. An kohhrana lo lawi tawh zawng zawngte he hun pawimawh tak hmanpui vek tûr hian an sâwm a ni.

□ Hmunthar Kohhran, Kulikâwn chuan ni 1-7 February, 2016 chhûng hian an Kohhran Silver Jubilee an lâwm dâwn a. He hun hman pui tûr hian Pastor leh Pro Pastor lo ni tawh zawng zawngte leh he Kohhrana lo lawi tawh zawng zawngte tel vek tûrin an sâwm.

## HINDI SERVICE HAWN A NI

November 22, 2015 (Pathianni) chawhnu dâr 3:30 khân Bâwngkâwn Presbyterian Kohhran Biak In-ah Hindi ÷awng hmanga inkhâwmna (Hindi Service) thar hawna neih a ni.

Programme hi Rev. Lalchhuanmawia, Synod Mission Board Secretary-in a kaihruai a, Rev. K. Lalthlanpuia, Masihi Sangati Kendra Director hnên aţangin inlawmna leh reports ngaihthlâk a ni a, Rev. P.C. Pachhûnga, Executive Secretary i/c Mission in Hindi Service thar hlanna hi neiin a hawng a, hemi atâna hruaitu tûrte Pathian hnênah hlânin thuchah a sawi ngâl bawk.

He Hindi Service hi kan ram hmasâwn zêlah eizawna leh hnathawhna hrang hrang avângin state pawn aţangin hnam dangte an lo lût ÷ahnem ve ta zêl a, labour leh mistiri rual chauh ni tawh lovin, Private Banks, University, Technical Institution hrang hrangah zirlai, hnathawk leh zirtîrtu an lo awm chho zel a. Sumdawng, Multi National Company lian tak tak te pawhin branch an rawn hawng chho ve zêl a, an la pun zêl pawh a rinawm bawk a ni.

## PC GIRLS NAUPANGTE FILM FESTIVAL-AH

November 14 - 20, 2015 chhûnga neih 19<sup>th</sup> International Children's Film Festival hmangin PC Girls School aţangin Miss Malsâwmdawngzeli leh zirlai 5 an kal.

November 14, 2015 tlâi dâr 5 ah opening programme neih a ni a, November 15 - 20 chhûngin movie hrang hrang, Children Film Festival puala film submitte en ÷hin a ni. Film-te hi naupang ÷anchhana siam a ni deuh vek a, film ÷henkhat te chu Director pawh naupang tê tê an ni a, a ÷hen chu Documentary Film te, Advertisement lam hawi te a ni a. Tlâi lamah Cultural programme neih ÷hin a ni

bawk.

PC Girls' School zirlai aţangin Lalhlimpuii chu Child Jury (endiktu) ah an la a, Child Jury hi group hrang hranga ÷hen an ni a. Lalhlimpuii te group hian Animation Film bik an endik a ni. He Film Festival ah India ram mai ni lo, ram hrang hrang - Japan, Korea, Taiwan, China leh a dangte aţangin Director leh chhimtu ÷ahnem tak an kal khâwm a ni.

## ATC Day 2015 HMAN A NI

November 20, 2015 (Zirtâwpmi) khan Aizâwl Theological College Centenary Building Quadrangle-ah Aizâwl Theological College Day hman a ni.

Chawhnu dâr 1:00-ah ATC Day lawmna programme hi neih ÷an a ni a, programme hi Rev. Lalrinmawia, Synod Moderator-in kaihruaiin hunserh a hmang a, Rev. Prof C. Lalhlîra, Principal-in Inlawmna leh Report hun a hmang a, Rev. Lalramliana Pachau, Executive Secretary-in zirlai tiñhate hnênah lâwmman chi hrang hrang a sem. Rt. Rev. Dr. J.S. Sadananda, Master, Council of Senate of Serampore College chuan College Day Address a pe a, Rev. Prof. Vanlalngâka Râltê, Vice Principal-in lâwmthu sawina hun a hmang a. Day lawmna inkhâwmah hian ATC Male Voice, College Choir leh Leitau Pastor Bial Zaipawl te an zai a ni.

Rev. Prof. Vanlalngâka Râltê, Vice Principal-in lâwmthu a sawi a, Rev. Lalzuithanga, Senior Executive Secretary-in Malsâwmna sawiin inkhâwm a ÷in a, Day lawmna thingpui ruai tuihna tak in ho a ni.

Aizâwl Theological College hi kum 1907 khan Mission Vêngthlangah Aizâwl Theological School tiin din a ni a, Principal hmasa ber chu Rev. D.E. Jones a ni. D.E. Jones hi kum 1923 khân Pu Sandy-an a thlâk a, kum 1924-ah College hi Durtlângah sawn a ni. Pu Sandy-a a thih tâk avângin kum 1927-ah Aizâwl lamah sawn thlâk a ni leh a. Kum 1964-ah Mizo Principal hmasa ber atân Rev. C. Pazawna a lo awm ÷an a, hei hi College-in hma a sâwn tak tak ÷anna chu a ni.